



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ**

ք. Երևան

24.07.2020թ.

**Ո Ր Ո Շ ՈՒ Մ
ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁԻ
թիվ ԱՑ-ԼՕ-2020/159**

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի
Քարտուղարությամբ՝ Ռ. Մկրտչյանի

Պատվիրատու՝ ՀՀ վիճակագրական կոմիտե
Մասնակից՝ «Վերէքս թեքնոլոջիս» ՍՊԸ

Մասնակցությամբ՝
ՀՀ վիճակագրական կոմիտեի ներկայացուցիչ՝ Է. Գրիգորյանի
«Վերէքս թեքնոլոջիս» ՍՊԸ-ի տնօրեն՝ Հ. Առաքելյանի

Գնման ընթացակարգի ծածկագիրը և առարկան՝
«ՀՀ ՎԿ-ԳՀԾՁԲ-2020/3» ծածկագրով գնանշման հարցման ընթացակարգ,
ծրագրային ապահովման մշակման ծառայությունների ձեռքբերում

ՀՀ գնումների հետ կապված բողոքներ քննող անձը (այսուհետ՝ նաև Բողոքներ
քննող անձ)՝ ուսումնասիրելով Հայաստանի Հանրապետության ֆինանսների
նախարարության կողմից 30.06.2020թ.-ի թիվ 26/26/9759-2020 գրությամբ «Վերէքս
թեքնոլոջիս» ՍՊԸ-ին (այսուհետ՝ նաև Մասնակից) գնումների գործընթացին մասնակցելու

իրավունք չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը,

Պ Ա Ր Ձ Ե Ց

1. Գործի նախապատմությունը.

ՀՀ ֆինանսների նախարարությունը, ՀՀ վիճակագրական կոմիտեի 25.06.2020թ. թիվ Ե/1002-20 գրության հիման վրա, 30.06.2020թ.-ին «Վեբէքս թեքնոլոջիս» ՍՊԸ-ին -ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնել է ընթացակարգ՝ Բողոքներ քննող անձին ներկայացնելով համապատասխան հիմքեր:

Բողոքներ քննող անձին գործը մակագրվել է 30.06.2020թ.-ին:

30.06.2020թ.-ին կայացված որոշմամբ գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը ընդունվել է վարույթ, տրվել թիվ ՍՑ-ԼՕ-2020/159 համարի ծածկագիրը և նույն օրը հրապարակվել է www.gnumner.am կայքում:

08.07.2020թ.-ին, 15.07.2020թ.-ին և 24.07.2020թ.-ին նշանակվել և հրավիրվել են նիստեր:

Գործի քննությունն ավարտվել է 15.07.2020թ.-ին և Բողոքներ քննող անձի որոշման հրապարակման օր է նշանակվել 24.07.2020թ.-ին:

2. ՀՀ վիճակագրական կոմիտե ներկայացրած փաստերը և դիրքորոշումը.

ՀՀ վիճակագրական կոմիտեն 25.06.2020թ. թիվ Ե/1002-20 գրությամբ դիմել է ՀՀ ֆինանսների նախարարությանը՝ հայտնելով հետևյալը.

«Ի լրումն Վիճակագրական կոմիտեի 2020 թվականի հունիսի 23-ի թիվ Ե/980-20 գրության, սույնով տեղեկացվում է Ձեզ առ այն, որ ՀՀ ՎԿԳՀԾՁԲ-2020/3 ծածկագրով գնման ընթացակարգի փաստաթղթերի պատճենները (կցվում են) ներկայացվում են Գնումների հետ կապված բողոքներ քննող անձի կողմից քննություն իրականացնելու նպատակով:

Միաժամանակ տեղեկացվում է, որ «Վերէքս թեքնոլոջիս» ՍՊԸ-ն 2020 թվականի հունիսի 24-ին ներկայացրել է պարզաբանում (կցվում է):»:

Ավելի վաղ՝ 23.06.2020թ.-ի թիվ Ե/980-20 գրությամբ Պատվիրատուն հայտնել էր նաև հետևյալը.

«Սույնով տեղեկացվում է Ձեզ առ այն, որ Վիճակագրական կոմիտեն (այսուհետ՝ Կոմիտե) Ծրագրային ապահովման մշակման ծառայությունների ձեռքբերման համար 2020 թվականի փետրվարի 18-ին հայտարարել է ՀՀ ՎԿ-ԳՀԾՁԲ-2020/3 ծածկագրով գնանշման հարցում: «Վերէքս Թեքնոլոջիս» ՍՊԸ-ի կողմից հայտի ապահովումը ներկայացվել է կանխիկ փողի ձևով Կենտրոնական գանձապետարանում լիազորված մարմնի անվամբ բացված «900008000466» գանձապետական հաշվին փոխանցում կատարելու միջոցով (համաձայն «Ակբա-Կրեդիտ Ագրիկոլ բանկ» ՓԲԸ-ի կողմից 2020 թվականի փետրվարի 24-ին տրված թիվ 8137 վճարման հանձնարարականի, կցվում է): Վերոնշյալ ընթացակարգի շրջանակում ներկայացված հայտի ապահովումները վերադարձնելու նպատակով Կոմիտեն 2020 թվականի մայիսի 25-ին դիմել է ՀՀ ֆինանսների նախարարությանը (կցվում է), սակայն վերջինս տեղեկացրել է (կցվում է), որ «Վերէքս թեքնոլոջիս» ՍՊԸ-ի կողմից հայտի ապահովման համար վճարված գումարը Կենտրոնական գանձապետարանում ՀՀ ֆինանսների նախարարության անվամբ բացված թիվ «900008000466» հաշվին չի մուտքագրվել (վճարման անդորրագրի տվյալներով հաշվեգրում առկա չէ):

Միաժամանակ տեղեկացվում է, որ Կոմիտեն 2020 թվականի հունիսի 9-ին գրությամբ (կցվում է) դիմել է «Վերէքս թեքնոլոջիս» ՍՊԸ-ին՝ պահանջելով հինգ աշխատանքային օրվա ընթացքում ներկայացնել կանխիկ փողի ձևով ներկայացված հայտի ապահովման փոխանցման կատարման հավելյալ հաստատում՝ տրված «Ակբա-Կրեդիտ Ագրիկոլ բանկ» ՓԲԸ-ի կողմից: «Վերէքս թեքնոլոջիս» ՍՊԸ-ի կողմից սահմանված ժամկետում ոչ մի տեղեկատվություն չի տրամադրվել, ուստի Կոմիտեն 2020 թվականի հունիսի 23-ին գրությամբ (կցվում է) դիմել է «Ակբա-Կրեդիտ Ագրիկոլ բանկ» ՓԲԸ-ին՝ ներկայացված վճարման հանձնարարականը իր կողմից տրամադրված լինելու, ինչպես նաև վերոնշյալ հաշվին փոխանցումը կատարելու հանգամանքը հավաստելու խնդրանքով:»:

Ելնելով վերոգրյալից և հիմք ընդունելով ՀՀ կառավարության 04.05.2017թ.-ի թիվ 526-Ն որոշմամբ հաստատված գնումների գործընթացի կազմակերպման կարգի 45-րդ կետի պահանջները, կից ներկայացվել է «ՀՀ ՎԿ-ԳՀԾՁԲ-2020/3» ծածկագրով հայտարարված գնման ընթացակարգի շրջանակներում «Վերէքս թեքնոլոջիս» ՍՊԸ-ի -ի տվյալները՝ համապատասխան հիմքերով:

3. «Վերէքս թեքնոլոջիս» ՍՊԸ-ի ներկայացրած փաստարկները և դիրքորոշումը.

Բողոքներ քննող անձը 30.06.2020թ.-ին գրությամբ դիմել է «Վերէքս թեքնոլոջիս» ՍՊԸ-ին՝ հնարավորություն տալով ՀՀ ֆինանսների նախարարության կողմից 30.06.2020թ.-ի թիվ 26/26/9759-2020 գրությամբ նախաձեռնված ընթացակարգի վերաբերյալ ներկայացնել գրավոր կարծիք:

Մասնակիցը ստանալով կարծիք հայտնելու վերաբերյալ գրությունը, ինչպես նաև ծանուցված լինելով նիստի տեղի, օրվա և ժամի մասին՝ ներկայացել է հրավիրված նիստերին և բանավոր կերպով հայտնել, որ մրցույթին մասնակցելու համար հայտ ուղարկելուց հետո, կատարվել է վճարում բանկում: Դրանից հետո գնումների մասնագետի հետ հեռախոսազրույցի ընթացքում պարզվել է, որ մրցույթը չեղյալ է համարվելու ու նորը հայտարարվի ըստ մասկաիցներից մեկի բողոքարկման: Սույն ինֆորմացիայի հիման վրա Մասնակիցն այցելել է բանկ և հետ պահանջել հայտի ապահովման գումարը, վերադարձնելով բանկին մրցույթին մասնակցելու համար ներկայացրած հայտին կից հայտի ապահովման բնօրինակը: Տնօրենը հայտնեց և հավաստեց, որ վերջինս 25.02.2020թ.-ին հետ է ստացել հայտի ապահովման համար վճարված գումարը:

4. ՍՑ-LO-2020/159 ընթացակարգի քննության համար էական նշանակություն ունեցող փաստերը.

Սույն գործի քննության համար էական նշանակություն ունեցող փաստերի համաձայն՝

i. ՀՀ վիճակագրական կոմիտեի (այսուհետ նաև՝ Պատվիրատու) կողմից ծրագրային ապահովման մշակման ծառայությունների ձեռքբերման նպատակով 18.02.2020թ.-ին հայտարարվել է «ՀՀ ՎԿԳՀԾՁԲ-2020/3» ծածկագրով գնանշման հարցման ընթացակարգ (այսուհետ նաև՝ Ընթացակարգ):

ii. Ընթացակարգին մասնակցելու նպատակով, ի թիվս այլ մասնակիցների, հայտ է ներկայացրել նաև «Վերէքս թեքնոլոջիս» ՍՊԸ-ն:

iii. «Ակրա-Կրեդիտ Ագրիկոլ բանկ» ՓԲԸ-ի կողմից 24.02.2020թ.-ին տրված թիվ 8137 վճարման հանձնարարականի համաձայն՝ «Վերէքս Թեքնոլոջիս» ՍՊԸ-ի կողմից հայտի ապահովումը ներկայացվել է կանխիկ փողի ձևով Կենտրոնական

գանձապետարանում լիազորված մարմնի անվամբ բացված «900008000466» գանձապետական հաշվին փոխանցում կատարելու միջոցով:

iv. Ընթացակարգի շրջանակում ներկայացված հայտի ապահովումները վերադարձնելու նպատակով Պատվիրատուն 25.05.2020թ.-ին դիմել է ՀՀ ֆինանսների նախարարություն:

v. ՀՀ ֆինանսների նախարարության կողմից 27.05.2020թ.-ին տրված գրության համաձայն՝ «Վեբէքս թեքնոլոջիս» ՍՊԸ-ի կողմից հայտի ապահովման համար վճարված գումարը Կենտրոնական գանձապետարանում ՀՀ ֆինանսների նախարարության անվամբ բացված թիվ «900008000466» հաշվին չի մուտքագրվել (վճարման անդորրագրի տվյալներով հաշվեգրում առկա չէ):

vi. Պատվիրատուն 09.06.2020թ.-ին գրությամբ դիմել է «Վեբէքս թեքնոլոջիս» ՍՊԸ-ին՝ պահանջելով հինգ աշխատանքային օրվա ընթացքում ներկայացնել կանխիկ փողի ձևով ներկայացված հայտի ապահովման փոխանցման կատարման հավելյալ հաստատում:

vii. ՀՀ վիճակագրական կոմիտեն «Վեբէքս թեքնոլոջիս» ՍՊԸ-ի տվյալները՝ համապատասխան հիմքերով, ՀՀ ֆինանսների նախարարությանն է ներկայացրել 23.06.2020թ.-ին թիվ Ե/980-20 գրությամբ:

5. Բողոքներ քննող անձի հիմնավորումները և եզրահանգումը.

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակցության, որ ՀՀ ֆինանսների նախարարության կողմից 30.06.2020թ.-ի թիվ 26/26/9759-2020 գրությամբ «Վեբէքս թեքնոլոջիս» ՍՊԸ-ին -ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգն ենթակա է մերժման, հետևյալ պատճառաբանությամբ.

«Գնումների մասին» ՀՀ օրենքի (այսուհետ նաև՝ Օրենք) 6-րդ հոդվածի 1-ին մասի 6-րդ կետի «ա» ենթակետի համաձայն՝ ... մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի

լուծմանը կամ գնման գործընթացին տվյալ մասնակցի հետագա մասնակցության դադարեցմանը:

ՀՀ կառավարության 04.05.2017թ.-ի թիվ 526-Ն որոշմամբ (10.10.2019թ.-ի թիվ 1422-Ն փոփոխություններով) հաստատված «Գնումների գործընթացի կազմակերպման» կարգի (այսուհետ նաև՝ Կարգ) 45-րդ կետի համաձայն՝ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում նախաձեռնում է տվյալ մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

Սույն գործում առկա փաստերի համաձայն՝ ՀՀ վիճակագրական կոմիտեի կողմից ծրագրային ապահովման մշակման ծառայությունների ձեռքբերման նպատակով 18.02.2020թ.-ին հայտարարված «ՀՀ ՎԿ-ԳՀԾՁԲ-2020/3» ծածկագրով գնանշման հարցման Ընթացակարգին մասնակցելու նպատակով հայտ ներկայացրած «Վերէքս թեքնոլոջիս» ՍՊԸ-ի կողմից հայտի ապահովումը ներկայացվել է կանխիկ փողի ձևով՝ Կենտրոնական գանձապետարանում լիազորված մարմնի անվամբ բացված «900008000466» գանձապետական հաշվին փոխանցում կատարելու միջոցով, հիմք՝ «Ակբա-Կրեդիտ Ագրիկոլ բանկ» ՓԲԸ-ի կողմից 24.02.2020թ.-ին տրված թիվ 8137 վճարման հանձնարարականը:

Ընթացակարգի շրջանակում ներկայացված հայտի ապահովումները վերադարձնելու նպատակով Պատվիրատուն 25.05.2020թ.-ին դիմել է ՀՀ ֆինանսների նախարարություն: Վերջինս 27.05.2020թ.-ին գրությամբ Պատվիրատուին հայտնել է, որ «Վերէքս թեքնոլոջիս» ՍՊԸ-ի կողմից հայտի ապահովման համար վճարված գումարը Կենտրոնական գանձապետարանում ՀՀ ֆինանսների նախարարության անվամբ բացված թիվ «900008000466» հաշվին չի մուտքագրվել (վճարման անդորրագրի տվյալներով հաշվեգրում առկա չէ):

Վերոգրյալ իրավական նորմերի և փաստական հանգամանքների համադրման արդյունքում, Բողոքներ քննող անձը հաստատված է համարում, որ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ են եկել ՀՀ ֆինանսների նախարարության կողմից Պատվիրատուին ուղղված 27.05.2020թ.-ի գրությամբ, սակայն ՀՀ վիճակագրական կոմիտեն «Վերէքս թեքնոլոջիս» ՍՊԸ-ի -ի տվյալները՝

համապատասխան հիմքերով, ՀՀ ֆինանսների նախարարությանն է ներկայացրել 23.06.2020թ.-ին թիվ Ե/980-20 գրությամբ՝ Կարգի 45-րդ կետով սահմանված 5 աշխատանքային օրյա ժամկետի խախտմամբ:

«Նորմատիվ իրավական ակտերի մասին» ՀՀ օրենքի 41-րդ հոդվածի 1-ին մասի համաձայն՝ նորմատիվ իրավական ակտի նորմը մեկնաբանվում է՝ հաշվի առնելով նորմատիվ իրավական ակտն ընդունելիս այն ընդունող մարմնի նպատակը՝ ելնելով դրանում պարունակվող բառերի և արտահայտությունների տառացի նշանակությունից, ամբողջ հոդվածի, գլխի, բաժնի կարգավորման համատեքստից, այն նորմատիվ իրավական ակտի դրույթներից, ի կատարումն որի ընդունվել է այդ ակտը, տվյալ նորմատիվ իրավական ակտով սահմանված սկզբունքներից, իսկ այդպիսի սկզբունքներ սահմանված չլինելու դեպքում՝ տվյալ իրավահարաբերությունը կարգավորող իրավունքի ճյուղի սկզբունքներից:

Ամբողջացնելով վերը թվարկված իրավական նորմերը, դրանց և գործում առկա փաստերի համադրման արդյունքում, Բողոքներ քննող անձը հանգում է այն եզրակացության, որ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում մասնակցի տվյալները՝ համապատասխան հիմքերով, լիազորված մարմնին ուղարկելը Պատվիրատուի պարտականությունն է, այն իմպերատիվ (պարտադիր) դրույթ է, որի պահպանմամբ է միայն հնարավոր փաստել իրավահարաբերության առաջացումը:

Հակառակ դեպքում Կարգի 45-րդ կետով սահմանված դրույթները չեն ծառայի իրենց նպատակին, այլակերպ մեկնաբանման դեպքում կհանգեցնեն որևէ ողջամիտ իրավական փաստարկով չհիմնավորվող մեկնաբանության՝ հաշվի չառնելով այն ընդունող մարմնի նպատակը, նորմում պարունակվող բառերի և արտահայտությունների տառացի նշանակությունը:

ՀՀ վճռաբեկ դատարանն իր նախկինում կայացված որոշումներից մեկով կարևորել է, որ Հայաստանի Հանրապետության՝ որպես իրավական պետության կարևորագույն հատկանիշ է այն, որ սահմանադրական մակարդակով պետությունը հավաստում է իր հավատարմությունն այդ տեսությանը, ճանաչում և ամրագրում է իր կախվածությունն իրավունքից, իրավունքի գերակայությունը՝ պետական իշխանության նկատմամբ: Իրավական պետության և իրավունքի գերակայության սկզբունքը, ի թիվս այլոց, դրսևորվում է նրանում, որ Հայաստանի Հանրապետությունը որդեգրել է մարդու և քաղաքացու հիմնական իրավունքների և ազատությունների՝ որպես անմիջականորեն

գործող իրավունք լինելու գաղափարը: Այն իր արտացոլումն է գտել նաև 2015 թվականի փոփոխություններով ՀՀ Սահմանադրության 5-րդ (Իրավական նորմերի աստիճանակարգությունը) և 6-րդ (Օրինականության սկզբունքը) հոդվածներում՝ մասնավորապես ամրագրելով, որ Սահմանադրությունն ունի բարձրագույն իրավաբանական ուժ, և որ **պետական և տեղական ինքնակառավարման մարմիններն ու պաշտոնատար անձինք իրավասու են կատարելու միայն այնպիսի գործողություններ, որոնց համար լիազորված են Սահմանադրությամբ կամ օրենքներով** (տե՛ս, «ՎՏԲ-Հայաստան քանկ» ՍՊԸ-ն ընդդեմ էդիկ Հակոբյանի թիվ LԴ/0509/02/13 քաղաքացիական գործով ՀՀ վճարելի դատարանի 12.07.2018 թվականի որոշումը):

Ընդ որում, պետաիշխանական լիազորություններով օժտված ցանկացած մարմնին, իր գործառնական կարգավիճակին համապատասխան, օրենքով և նորմատիվ իրավական ակտերով կարող են վերապահվել ինչպես պարտադիր, այնպես էլ հայեցողական լիազորություններ՝ պայմանավորված սահմանադրաիրավական այն հիմնադրույթի իրացման անհրաժեշտությամբ, ըստ որի՝ պետական և տեղական ինքնակառավարման մարմիններն ու պաշտոնատար անձինք իրավասու են կատարելու միայն այնպիսի գործողություններ, որոնց համար լիազորված են Սահմանադրությամբ կամ օրենքներով, չպետք է հակասեն և պետք է համապատասխանեն Սահմանադրությանը, օրենքներին կամ նորմատիվ իրավական ակտերին:

Այսպիսով, վերոհիշյալ փաստական հանգամանքների և իրավական նորմերի լույսի ներքո, դրանց համակարգված վերլուծության արդյունքում, Բողոքներ քննող անձը հանգում է այն եզրակացության, որ Պատվիրատուի կողմից չի պահպանվել Կարգի 45-րդ կետի դրույթներով սահմանված իմպերատիվ (պարտադիր) դրույթները, քանի որ, ինչպես վերը նշվեց, Կարգի 45-րդ կետի պահպանմամբ է միայն հնարավոր փաստել գնումների գործընթացին մասնակցելու իրավունք չունեցող մասնակիցների ցուցակում ներառելու իրավահարաբերության առկայությունը և դրանից հետո նոր միայն ըստ էության անդրադառնալ Պատվիրատուի կողմից ներկայացված Օրենքի 6-րդ հոդվածի 1-ին մասի 6-րդ կետով նախատեսված համապատասխան հիմքերի օրինաչափությանը: Այլ կերպ ասած՝ մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու Ընթացակարգի քննությունը, Կարգի 45-րդ կետով սահմանված ժամկետների խախտման արդյունքում, սահմանափակվում է ընթացակարգային նորմերի կիրառմամբ:

Վերոնշյալներով պայմանավորված՝ «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետում նշված պատասխանատվությունը չի կարող վրա հասնել ու հանգեցնել Մասնակցին՝ գնումների գործընթացին մասնակցելու իրավունք չունեցող մասնակիցների ցուցակում ընդգրկելուն:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ՀՀ գնումների հետ կապված բողոքներ քննող անձը՝

Ո Ր Ո Շ Ե Ց

1. ՀՀ ֆինանսների նախարարության կողմից 30.06.2020թ.-ի թիվ 26/26/9759-2020 գրությամբ «Վեբէքս թեքնոլոջիս» ՍՊԸ-ին -ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ՍՑ-ԼՕ-2020/159 ծածկագրով ընթացակարգը մերժել:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

ՀՀ ԳՆՈՒՄՆԵՐԻ ՀԵՏ ԿԱՊՎԱԾ

ԲՈՂՈՔՆԵՐ ՔՆՆՈՂ ԱՆԶ՝

ԼԵՎՈՆ ՕՀԱՆՅԱՆ

